

मार्निंग डोगरी न्यूज़ बुलेटिन, समें. 09-20 Hrs



Headlines

- लोकसभा च वक्फ(संशोधन) बिल-2025 गी मंजूरी दित्ती एह्दे पक्खे च 288 वोट ते खलाफ 232 वोट पाए गे। बिल दा मकसद वक्फ दी संपत्तिएं दे प्रबंधन गी कारगर बनाना ऐ।
- जम्मू कश्मीर सरकार नै सार्वजनिक वितरण प्रणाली दे तैह्त अंतयोदय अन्न योजना दे औहने आले उनें परोआरें जेह्दे चार जां चार शा बद्ध सदस्य न, गी बाद्धू अन्नदाना मुफ्त देने दी घोषणा कीती ऐ।
- कैबिनेट मंत्री समीश शर्मा होरें नमीं दिल्ली च ऐतिहासक बौद्ध नगरी अंबरान पर इक नमैश दा उदघाटन कीता, अखनूर गी राष्ट्री सैलसफा आले मानचित्र पर औहनने दी वचनबद्धता गी फही पक्का कीता।
- भारत सरकार नै आखेआ जे जम्मू कश्मीर दे पंचायत ढांचे दे विकास आस्तै 15में माली आयोग ते राष्ट्री ग्राम स्वराज अभियान तैह्त लोड़चदे फंड अलॉट कीते गे न।



LS Passes Waqf Bill

लोकसभा नै विपक्ष दे संशोधनें गी खारज करदे होई वक्फ (संशोधन) विधेयक, 2025 पास करी दित्ता ऐ। लोकसभा च 288 सदस्यें विधेयक दे पक्ख च जदके 232 सदस्यें एह्दे बरोध च मतदान कीता। लोकसभा च 12 घैंटें शा मते समें तगर चिरें रातीं तोहड़ी इस बिल पर चर्चा होई। वक्फ (संशोधन) विधेयक, 2025 दा मकसद विरासती थाहरें दी सुरक्षा ते समाजी कल्याण गी बढ़ावा देने दे कन्नै गै वक्फ संपत्तियें दा प्रबंधन सुबवस्थित करना ऐ। एह्दा मकसद संपत्ति प्रबंधन च पारदर्शिता बधाना, वक्फ बोर्डें ते मुकामी अधिकारियें बश्कार तालमेल कायम करना ते सरबंधत पक्खें दे अधिकारें दी राक्खी करना ऐ। विधेयक च मुस्लिम महिलाएं, खास तौर उप्पर विधवाएं ते तलाकशुदा महिलाएं दी आर्थिक ते समाजी स्थिति च सुधार दा बी मकसद ऐ। विधेयक दा उद्देश्य वक्फ बोर्ड गी मता समावेशी बनाना ऐ, जेह्दे'नै बेहतर वक्फ शासन ते फैसले लैने च बक्ख-बक्ख मुस्लिम संप्रदायें दी नुमाइंदगी होऐ। विधेयक पर चर्चा दा परता दि'दे होई अल्पसंख्यक मामलें दे मंत्री किरें रिजीजू होरें आखेआ जे एह् धारणा गलत ऐ जे गैर-मुस्लिम वक्फ बोर्ड दे कम्मकाज च दखलंदाजी करडन। उ'नें आखेआ जे भारत अल्पसंख्यकें लेई सभ्मनें शा सुरक्षित मुख्य ऐ।

सरकार पर अल्पसंख्यक बरोधी होने दे विपक्ष दे आरोप गी खारज करदे होई उ'नें आखेआ जे नरेंद्र मोदी सरकार नै पारसिये जेह सब्भनें लौहके अल्पसंख्यक समुदाये दा बी ख्याल रखेआ ऐ। इस बिल गी गैर-संवैधानिक करार देने आहले बरोधी धड़े दे सदस्ये दे आरोपे दा परता दि'दे होई उ'नें आखेआ जे बरोधी सदस्य एहदे पिच्छे कोई वजह नेई दस्सी सके न। एहदे शा पैहले एह बिल सदन च पेश करदे होई श्री रिजीजू होरे आखेआ जे एहदा मुसलमाने दी धार्मिक प्रथाएं कन्ने कोई लैना-देना नेई ऐ ते एह छड़ा वक्फ बोर्ड कन्ने सरबंधत संपत्तिये कन्ने जुड़े दा ऐ। उ'नें विपक्ष पर आरोप लाया जे ओह इस बिल दे बारे च लोकें गी गुमराह करा'रदा ऐ। बैहस च हिस्सा लेंदे होई गृह मंत्री अमित शाह होरे आखेआ जे वक्फ च कोई बी गैर-मुस्लिम नेई औग। उ'नें आखेआ जे धार्मिक संस्थाएं दे प्रबंधन च कुसै गैर-मुस्लिम गी शामिल करने दा कोई प्रावधान नेई ऐ।

<><><><><><>

AAI-PDS

जम्मू कश्मीर सरकार नै सार्वजनिक वितरण प्रणाली दे तैहत अंतयोदय अन्न योजना दे हेठ औहने आले उनें परोआरे जेहदे चार जां चार शा बद्ध सदस्य न, गी अतिरिक्त अन्नदाना मुफ्त देने दी घोषणा कीती ऐ। आकाशवाणी दे जम्मू संवाददाता दी इक रिपोर्ट मूजब मुख्मन्त्री उमर अब्दुल्ला होरे इस पैहलकदमी गी लोकें दी भलाई बेह्तरी आला इक बड्खा फैसला दस्सेआ ऐ। उनें आखेआ जे एह फैसला बजट 2025-26 च कीते गेदेवादे गी पूरा करदा ऐ। सरकार नै अपने आदेश च आखेआ ऐ जे नियमें मताबक एह सहूलत छड़े उनें परोआरे गी गै थहोग, जेहड़े अंतयोदय अन्न योजना दे हेठ ओंदे न। आदेश दे मताबक चार सदस्य आले परोआर गी 5 किलोग्राम अतिरिक्त अन्नदाना दित्ता जाग, 5 सदस्ये आले परोआर गी 15 किलोग्राम अतिरिक्त अन्नदाना, 6 सदस्ये आले परोआर गी 25 किलोग्राम इआं गै एहदा अनुपात परोआरे दे सदस्ये दी गिनतरी मताबक बधदा जाग। इस नैहले अंतयोदय अन्न योजना दे हेठ औहने आले परोआरे गी 35 किलोग्राम अन्नदाना थहोआ करदा ऐ।

<><><><><><>

CS-IRS

मुख्य सचिव अटल डुल्लू होरे कल सरबंधत अधिकारिए कन्ने इक बैठक दी अध्यक्षता करदे होई केन्द्र शासत प्रदेश च आपदा प्रतिक्रिया प्रणाली यानि इनसीडेंट रिसपांड सिस्टम(आईआरएस) गी लागू करने आस्तै उंदे शा जानकारी लैती। मुख्य सचिव होरे बैठक दरान बोलदे होई बक्ख-बक्ख सरकारी मैहकमे ते कनून नाफिज करने आली अजेसिएं दी भूमका ते जिम्मेदारिएं पर लोह पाई। डुल्लू होरे आखेआ जे इस प्रणाली दी सादे खित्ते च खास महत्त्वता ऐ की जे इस इलाके मती सारी आपदाये दी शँका बनी दी रौहदी ऐ।

मुख्य सचिव होरें अग्गे आखेआ जे जम्मू कश्मीर च बक्ख-बक्ख किस्में दी भौगोलिक स्थिति ते आबोहवा ऐ, इस करियै इनें चुनौतिएं गी ध्यान च रखदे होई रणनीति ते योजना बनना लाजमी ऐ। उनें सब्बनें गी इस उप्पर बचार करने दा आह्वान कीता।

<><><><><><>

CS-JTFRP

मुख्य सचिव अटल डुल्लू होरें इक बैठक दी अध्यक्षता कीती जिस दरान ऐरा दे मुख्य कारजकारी अधिकारी होरें जेहलम ते तवी फलड रिकवरी प्रोजेक्ट बारे ताजातरीन जानकारी उपलब्ध करोआई। विश्व बैंक नै बाकी रौहदे कम्में लेई म्याद बधाई दित्ती ऐ। मुख्य सचिव होरें ऐरा पर इस गल्ला लेई गौर पाया जे ओह कम्में दी प्रगति पर नियमित तौर पर निगरानी रखन। उनें कम्में गी समें सिर मुकम्मल करने पर जोर पाया। मुख्य सचिव होरें भवन ते निर्माण मैहकमे गी आखेआ जे ओह कम्म सेई ढंगै सिर नेई करने आले ठेकेदारें खलाफ कारवाई करन। उनें सरकारी एल.डी.अस्पताल दे 130 बिस्तरे आले बाद्ध ब्लाक गी समें सिर पूरा करने पर जोर पाया। जेटीएफआरबी पर अजें तगर 15 अरब 47 करोड़ ते 50 लक्ख रपे दा खर्च होआ ऐ ते विश्व बैंक आस्सेआ 14 अरब 65 करोड़ 86 लक्ख रपे देई दित्ते गे न। इस परियोजना गी 31 अगस्त 2026 तगर बधायी गेआ ऐ।

<><><><><><>

PM-Intership Scheme

मकामी नोजवानें आस्तै मुफ्त हुनर सिखलाई ते उद्यमता विकास कार्यक्रमें दा समें समें पर सरिस्ता करियै उनेंगी सशक्त बनाने च आई.टी.आई हुनर विकास मैहकमा रामबन इक अहम भूमका निभांदा ऐ। हाल च गै मैहकमे आस्सेआ प्रधानमंत्री इंटरशिप योजना गी बढ़ावा दित्ता जा'रदा ऐ। एह योजना विश्वविद्यसलय अनुदान आयोग यानि यूजीसी दी डिग्री जां फही एआईसीटीई शा मान्यता आली यूनिवर्सिटिं दी डिग्री धारकें आस्तै तैआर कीती गेदी ऐ। साढे जिला संवाददाता कन्नै गल्ल करदे होई आई.टी.आई रामबन दे सुपरीटेंडेंट परवेज इकबाल होरें आखेआ.....

<><><><><><>

Ambaran Exhibition

यातायात मंत्री सतीश शर्मा होरें कल नमीं दिल्ली च नैशनल म्यूजियम ऑफ इंडिया दे अजंता हाल च ऐतिहासक बौद्ध नगरी अंबरान पर 40एं दिनें दी फोटो नमैश दा उद्घाटन कीता। नमैश गी नैशनल म्यूजियम ऑफ इंडिया ते सेंटर फॉर हिमालयन एशियन स्टडीज एंड एंगेजमेंट यानि चेज नै सांझे तौरा पर आयोजित कीते दा ऐ। नमैश च शामिल फोटो वरिष्ठ फोटोग्राफर विजय क्रांति ते उंदे पुत्र अक्षत क्रांति होरें खित्ते दे न। इस मौके पर बोलदे होई मंत्री समीश शर्मा होरें आखेआ जे उंदे पिता सुर्गीय मदन लाल शर्मा होरें अंबरान दी साज-संभाल आस्तै बड़े मते जतन कीते हे। उनें आखेआ जे नमैश च लाई गेदिएं फोटोएं राएं मदन लाल शर्मा हुंदे कीते गेदे जतनें गी तसदीक मिलदी ऐ। उनें आचोआ जे अखनूर ते अंबरान गी बौद्ध सेलसफा दे राश्री मानचित्र पर औहनने च मदन लाल शर्मा हुंदा अनमुल्ला योगदान ऐ।

<><><><><><>

RGSA-Panchayat

सरकारै जम्मू कश्मीर च पंचैतें दे ढांचागत विकास लेई लोडचदे फंड अलॉट कीते न। एह फंड 10में माली आयोग ते नमें सिरिया ग्राएं दे विकास लेई तैआर राष्ट्रीय ग्राम स्वराज अभियान तैहत हासल करोआए गे न। आकाशवाणी जम्मू संवाददाता दी रिपोर्ट मूजब एह जानकारी लोकसभा च मंजू शर्मा हुंदे आस्सेआ पुच्छे गेदे सुआले दे परते च दित्ती गई। चालू ब'रे दरान जम्मू कश्मीर च 970 पंचैत भवन लेई मंजूरी दित्ती गई ऐ। 15में माली आयोग दा ग्रांट राएं जम्मू कश्मीर लेई 2023-24 च 25 अरब 19 करोड़ 24 लक्ख रपे जिसलै कि इस माली ब'रे च 3 जहार 520 करोड़ रपे रखे गे न। सरकार पंचैतें गी सशक्त करने लेई वचनबद्ध ऐ।

<><><><><><>